


XE'N TANE'N KATAJ RYOS



Escrito por Enrique McArthur


Primera edición 1,996

Un estudio Bíblico que promueve el autoaprendizaje
en el idioma materno de Aguacatán.

Segunda Edición julio de 2020

100 copias impresas ©

Editado por: Josue Pérez Velásquez

 (502) 5892 7644

Aguacatán, Huehuetenango

Yi Chusu'n yi at tul yi liwre'j

Xe'tzbil Yi Kachusun	1
Yi Xe'n Tane'n Ryos	2
Yi Kataj Ryos i' bnol tetz cyakil yi e'chk takle'n yi at	2
Yi Kataj Ryos i' yi Ajcaw tetz ben k'ej ben sak	2
Yi Yol Kataj na xchaj sketz yi at ox bi' Kataj Ryos.....	3
Yi bajx bi' i'tz "Kataj Ryos"	3
Yi ca'p bi' i'tz "Cy'ajol"	3
Yi toxi'n bi' i'tz "Espiritu Sant"	3
Yi Ryos at nin I'-tz le xe'tzbil tzaj (Eterno)	4
Yi poder Ryos qui'c xe'tzbil (omnipotencia)	4
¿Mbi na elpont yi yol omnipresente?	5
Yi Ryos qui na xtx'ixpuj yi tajtza'kl (inmutable).....	6
Yi Ryos i' taw cyakil ajtza'kl (omnisciencia)	6
Yi Ryos chin xan nin I' (Santo).....	7
Yi Ryos i' taw yi lok' ib (Dios es amor).....	8
Yi Ryos chin tz'aknak cu'n tajtza'kl (Justo)	9
YI RYOS YI ITZ' NIN TETZ.....	10
Tan qui tele'n yi kachusun te Kac'u'l.....	13

XE'TZBIL YI KACHUSU'N

¿Xë’n tane’n Kataj Ryos? At wi’nin chusu’n na kubit tibaj yi txolbil tetz yi “trinidad”, “Dios Padres, Dios Hijo y Dios Espíritu Santo” cyakil wunak na cyaj tz’el chitxum tetz poro at q’uixbel tan tele’n katxum tetz.

Deuteronomio 29:29

»Lo secreto le pertenece al SEÑOR nuestro Dios, pero lo revelado nos pertenece a nosotros y a nuestros hijos para siempre, para que obedezcamos todas las palabras de esta ley.

Yi txolbil yi nkasi’lej le Deuteronomio 29:29 na jop wi’nin txolbil yi qui’c cuj tan tele’n katxum tetz, wunak tu o’ yi qui’c mas kajtza’kl tan tele’n katxum tetz yi xë’n tane’n Ryos.

Tul yi chusu’ne’j skile’ le Yol Kataj, cobox txolbil yi xë’n tane’n txumu’n Ryos nin mbi’tz yi tajbil i’ ske’j.

Quiwit bin tan xome’n te Kajcaw Jesucristo nin tyoxtu’ tan si’le’n yi Yol Kataj yi at tul yi jun chusu’ne’j, lok ch’eyan tan chibene’nu’ swutz.

YI XË'N TANE'N RYOS

Yi xtxolbil “Doctrina de Dios” na elpont yi i'tz jun chusu'n te yi xë'n cu'n tane'n Kataj Ryos, ilenin na ke'l yab te yi na a'lchij “Dios Padres, Dios Hijo y Dios Espíritu Santo”. I na ban skawutz yi ox cu'n Ryos at poro qui', i'tz jun ntzi'. Cha'stzun te, chin tajwe'n cunin yi o' ketz yi o' creyent yil ko'c il tan si'le'n yi Yol Kataj tan tele'n katxum mu'x tal te yi mbi eka'n tan yi jun chusu'na'tz.


Yi Kataj Ryos i' bnol tetz cyakil yi e'chk takle'n yi at

Je na tal Colosenses 1:16

“Ej nin i' bnol tetz cyakil yi mbi cunin at tcya'j tu yi at wuxtx'otx'. Na i' bnol tetz cyakil yi e'chk takle'n yi na kil tuml cyakil yi e'chk takle'n yi txe'n kil. Na i' txumul cyetz yi e' yi ate' tcya'j, yi e' yi qui na kil chiwutz, yi e' yi at ca'wl xchik'ab, yi e' yi e' bajxom, na i' bnol tetz cyakil tan xcone'n tetz.”

Yi Kataj Ryos i' yi Ajcaw tetz ben k'ej ben sak

Ja tal Ryos tul Isaías 22:6 “...In yi xe'tzibil nin In yi wi'tzibil, qui'c junt at, ma na ntin cu'n In...” Yi jun xtxolbila'tz tul Isaías 22:6 na xchaj sketz yi jun ntzi' Ryos at, tetz ben k'ej ben sak.



Yi Yol Kataj na xchaj sketz yi at ox bi' Kataj Ryos

Yi ox bi'aja'tz i'tz: Kataj, Cy'ajol nin yi Espíritu Sant. Na xcon yi ox bi'a'tz ka'n, poro i'tz jun ntzi' Ryos na katzan tan na'wse'n.

YI BAJX BI' I'TZ “KATAJ RYOS”

Na I' Ryos nin nk'era'tz yi k'ej, na teinxchan ja cyal wunak tetz yi k'ej “kataj k'ej”. Ncha'tz ja cyal “katxu' luna” nin “katxu' ixin”.

Yi e' kamam kate' ja xcon yi yol kataj k'ej tu katxu' luna' cya'n, na le wutz cyetz cyajtza'kl yi e' ryos. Poro tul yi Yol Kataj qui'c jun tir na tal yi at jun karyosil yi i'tz katxu', nin qui'c rmeril tan kalol yi ixin i'tz karyosil, na i'tz ixin tu' nin Ryos txumul tetz.

YI CA'P BI' I'TZ “CY'AJOL”

Na je na tal Juan 1:1-2 “Le xe'tzibil tzaj at jun yi at nintz, yin a bi'aj Yol (Cy'ajol). At nin I'-tz tu Ryos, le xe'tzibil tzaj, na ite'nin Ryosa'tz.”

Yi tulake'n yi Cy'ajol tzone'j wuxtx'otx', ja oc tetz mero wunak. Tul 1 Timoteo 2:5 na tal: “Na ntina'tz jun Ryos at, nin ntina'tz jun kayolol at skaxo'l tu Ryos, i'tz **Jesucristo** yi jun yi ncha'tz wunak i'.”

Tajwe'n tan toque'n yi jun Cy'ajola'tz tetz mero wunak, bantz quime'n tetz kaxel. Na je na tal tul 1 Corintios 15:21: “Na tan tu' paj jun yaj (Adán), na kaquim len. Poro ncha'tz tan tu' junt yaj (Jesucristo) at rmeril yil kitz'ij xchixo'l alma'.”

YI TOXI'N BI' I'TZ “ESPÍRITU SANT”

Yi Espíritu Sant i' Ryos, kasi'le' yi mbi na tal Hechos 5:3-4: “Yi tpone'n Ananías swutz Lu', nintzun tal Lu'-tz tetz: —Ananías, ¿mbi tzuntz mawak' ama'l tetz Bayba'n, yi ncu' atxumul yi wi awak' tetz yi Espíritu Sant? Na ja cyaj cyen acabsal noc te yi mero jamel yi tx'otx'.”

Kasi'le' junt xtxolbil le Efesios 4:30 yi na tal: “Quil cyak'u' bis tetz yi Espíritu Sant yi najlij te kalma'. Na i' jun kechl yi o' tetz Ryos. Nin tan tu' yi at i' te kalma' jun cu'n kelepon liwr yil tz'ul yi wi'tzibil k'ejlal.”

Ncha'tz na bi'aj porer Ryos, ba'n kasi'lej yi xtxolbil le Génesis 1:2 “Poro yi wuxtx'otx' qui'c xtxolbil tane'n. Na a' cu'n pi'lij tibaj cyakil luwar. Ej nin tz'o'tz nin tunin bene'n tzi'n. Qui'c jun takle'n at. Poro yi **Porer Ryos** na nin xon tera'tz tibaj yi a' yi pi'lij.”

Yi porer Ryos na elpont yi Espíritu tetz Ryos, na nin xon tera'stz tibaj yi a' yi pi'lij; at nin i'-tz te ntaxk bnix yi wuxtx'otx'.

Tul Mateo 28:18, 19 chin clar cunin na jal yi ox bi' Ryos ka'n: “Toque'n tzun xkansal tib Jesús scye'j, nintzun taltz: —Ak'ij wetz ink'ej tan cawu'n tcyaj, nin tan cawu'n wuxtx'otx'. Cha'stzun te quibene'nk xchixo'l cyakil yi jilwutz wunak bene'n tzi'n wi munt. Chuswoke' te weri inchusu'n; nin banwoke' bautizar tan **bi' Intaj**, nin tan **wetz imbi' yi in Cy'ajol**, tu yi bi' yi **Espíritu Sant**.”

Tan yi e'chk xtxolbila'se'j na xchaj sketz yi junit I', nin i'tz Ryos yi txumul tetz nin bnol tetz cyakil yi e'chk takle'n yi na kil. Cha'stzun te, at wi'nin xtxolbil yi qui na lajluchax skawutz na qui tu ilwutz o' swutz I'.

YI RYOS AT NIN I'-TZ LE XE'TZBIL TZAJ (ETERNO)

Yil ko'c tan xtxumle'n yi xë'n tane'n Kataj Ryos tajwe'n yil tz'a'tij le kawi' yi at nin i'-tz le xe'tzibil tzaj, na ya'stzun na tal yi Yol Kataj tul Deuteronomio 33:27 “El Dios sempiterno es tu refugio...” (refugio eterno) NVI

Yi na elpont yi qui'c xe'tzibil nin qui'c wi'tzibil nka tzajbil wi'. Ej nin xlaj i' at ama'l kalel kacolwit kib tetz ben k'ej ben sak.

Yi Kataj Ryos at i' sajle'n tunintz, nin sbne' opon tunintz. Yi Kataj Ryos qui'c xe'tzibil nin qui'c stzajbil I'. Le Salmo 90:2 na tal: “Ta', at ninu'-tz te yi ntaxk bnix yi e'chk wutz yi at bene'n tzi'n. Nin at ninu'-tz te yi ntaxk bnix yi wuxtx'otx', nin at ninu'-tz sajle'n tunintz nin sbne' opon tunitz”.

Yi poder Ryos qui'c xe'tzibil (omnipotencia)

Ncha'tz Deuteronomio 33:27 na xchaj yi at yi tetz poder yi qui'c xe'tzibil nin qui'c wi'tzibil, nin list i' tan xconse'n yi jun porera'tz tan kuch'eye'n.

Yi Kataj Ryos i'-te'n nchajon yi at tetz porer sajle'n tunintz. Na je na tal Romanos 1:20 “Na jetz yi cwe'nle'n wuxtx'otx' ja lajluchax yi porer Ryos tan yi e'chk takle'n yi bnixnak ta'n. Tan yi xtxolbila'tz na lajluchax yi i' Ryos. Cha'stzun te quil chixcye' tan chicolol quib swutz i'”. (Yi e' yi qui na cyak xchi' Ryos).

Ta' qui'c jun e'chk takle'n yi qui'k na xcy'e'u' tan banle'n na tircu'n na xcy'e'u' te'j.
(Job 42:1-2; Marcos 10:27)

¿Mbi na elpont yi yol omnipresente?

A. Na elpont yi at nin tunin Ryos lakak e'chk ama'l cyakil tiemp. Salmos 139:7-12 na tal: “Qui'c rmeril yi nink chimben joylaj tan wewal wib swutz yi teru' espírituju'. Qui'c rmeril nink wew wib swutzu'.

Na yi nink chinjepon tzi'n tcyaj, at ninu'-tz. Nin yi nink chimben jak' tx'otx' x̄chixo'l alma', at ninu'-tz.

Yi nink chimben xicy'in joylaj tele'n tzi'n, kale na je'ule't k'ej, nka yi nink chimben cwe'n tzi'n jalajicy'en mar, ilenin tz'opon k'abu' swe'j. Nin chintx'amxok tanu'.

Mpe nink wew wib tc'u'l tz'o'tz. Mpe nink tz'oc yi tkan skil tetz tz'o'tz. Quil xcy'e' yi tz'o'tza'tz tan wewe'n swutzu'. Na yi tz'o'tz, chin tkan skil nin na ban swutzu'. Na yi tz'o'tz tu yi tkan skil, nicy' nin tu' swutzu'".

Ncha'tz na tal I Reyes 8:27a: “¿Bintzij pe lo' yi ba'n tz'a'tij Ryos bene'n tzi'n wi munt? Bintzi, na yi tcyaj tu yi wuxtx'otx' qui tu k'usij swutz i'.

B. Yi Ryos ilenin at I' scye'j cyakil yi e' creyent bene'n tzi'n wi munt nin at I' scye'j x̄chijunalen.

Ncha'tz tal I' scyetz yi e' yi ate' sju' yi tak'un: “Ba'n k'uke' ic'u'l yi xomchin tzite'j jalen yil tzaj wi' yi tiempe'j.” (Mateo 28:20)

Ncha'tz tal scyetz yi e' yi cho'n k'uklij chic'u'l te'j: “Quinin xwil cyen, nin quinin cxe'l wok te inc'u'l” (Hebreos 13:5c).

Yi yol omnipresente ncha'tz na elpont yi na til Ryos cyakil yi e'chk takle'n yi na kaban. Kasi'le' Juan 1:48 yi na tal:

“—¿X̄e'n mme'l xtxumu' swetz? na qui tajske'n tib kawutz tuch'u', —stzun Natanael tetz Jesús.

—Te yi atiḡ jak' yi jun wi' ipḡ, ej nin yi ntaxk xa'k Li'p tan achakle'n, nsken wajskej awutz, —stzun Jesús bantz tetz.

Yi Ryos qui na xtx'ixpuj yi tajtza'kl (inmutable)

Santiago 1:17 na tal: “...poro yi Kataj qui na xtx'ixpuj yi tajtza'kl. Siquier najk txalca'p mu'x̣ tal tajtza'kl i'.

Ncha'tz tul 1 Juan 1:9 na tal: “Poro kol katxol yi kil, ba'n k'uke' kac'u'l te'j yi tz'elepon k'ab te yi alijt cyen ta'n. Na chin tz'aknak cunin i' te yol, na list i' tan cuyle'n kapaj, nin tan xtx'ajle'n cunin cyakil yi ilc'ol yi at ske'j.”

Jun cu'n na el cu'n i' te Yol yi suki'nt ta'n, Hebreos 6:18 na tal: “At bin cob quiwel yi qui'c rmeril tan je'n tx'ixp, i'tz yi yol Ryos, tu yi quiwel yi yol i' yi xcon ta'n. Na yi ketz kaRyosil qui'c rmeril yi qui'k tz'el k'ab te yi tetz yol. Cha'stzun te yi o' yi ja wi't ko'c tk'ab Ryos tan kacolol kib, ba'n k'uke' kac'u'l te'j yi jun cu'n skacambok te yi at kach'iw te'j.”

Ncha'tz Jesucristo qui na xtx'ixpuj yi tajtza'kl, na ite'nin tajtza'kl i' sajle'n tunintz jalen jalu' nin sbne' opon tunin. Hebreos 13:8 na tal: “Na yi Cristo qui na xtx'ixpuj yi tetz tajtza'kl. Na ite'nin tajtza'kla'tz sajle'n tunintz, nin sbne' opon tunintz.”

Santiago 1:17 na tal: “Cyakil balaj oy, nin cyakil yi oy yi tz'aknak cu'n, cho'n na saj tcya'j. Cho'n na saj te Kataj yi bnol cyeri txekbil yi at tcya'j. Yi e'chk txekbila'tz na chitx'ixpuj quib cyera'tz, poro yi Kataj qui na xtx'ixpuj yi tajtza'kl. Siquier najk txalca'p mu'x̣ tal tajtza'kl i'.”

Yi Ryos i' taw cyakil ajtza'kl (omniciencia)

Na tal tul Romanos 11:33-34:

- 33 Chumbalaj nin Kataj Ryos, na qui bajsbe'n tetz yi banl talma' i'. Nin qui'c jun takle'n yi qui'k na pujx ta'n, na chin tz'aknak cu'n tajtza'kl i'. Nin cya'l jun yi nink xcy'e' tan tilwe'n yi mbi na icy' te'u'l. Cya'l jun yi nink pujx yi tajtza'kl Ryos ta'n.
- 34 Na tz'iba'n cyen: "Cya'l jun na el xtxum tetz yi mbi na icy' te'u'l Kataj Ryos. Cya'l jun yi nink xcy'e' tan stz'akse'n cyen yi tetz tajtza'kl.

Ncha'tz tal Kajcaw Jesucristo tul Mateo 11:19 b:

“...Poro na lajluchax yi chin tz'aknak cu'n tajtza'kl Ryos tan yi e'chk takle'n balaj yi na bnix cyak'un yi e' tetz nitxajil," stzun Jesús...”

Ba'n kasi'lej Marcos 6:2; tu 1 Corintios 1:25 tan kilol yi jun cu'n, Ryos taw yi ajtza'kl.

Marcos 6:2

Itzun le jun k'ej ujle'n, nintzun oc Jesús tan chichusle'n wunak le sinagoga. Yi quibital wunak yi chusu'n yi tak' i', wi'nin tzun cyele'n yabtz te'j. —¿Xë'n njal tajtza'kl yi yaje'j? ¿Qui bi chusu'nil yi cy'a'n ta'n, nin xë'n na xcye' tan banle'n milawr?

1 Corintios 1:25

Na yi tajtza'kl Ryos mas tz'aknak cu'n swutz yi cyajtza'kl alchok jilwutz wunak. Nin yi porer i', i'tz mas cham swutz yi cyetz chichamil.

Yi Ryos chin xan nin I' (Santo)

Yi xtxolbile'j na elpont yi qui'c mu'x tal til Ryos na juch, na chin tz'aknak cu'n I'. Ej nin na xchaj yi qui'c jun yi ni'cu'nk chi I'. Kasi'le' 1 Pedro 1:15-16 yi na tal:

- 15 Ma na cho'ku' tz'aknak cu'n swutz Ryos, yi jun yi e' moxon tzaju'. Cho'ku' tz'aknak cu'n te cyakil yi na chibanu' na yi Kataj Ryos chin tz'aknak cu'n i'. Qui'c mu'x tal til.
- 16 Cho'ku' tzuntz tetz tz'aknak cu'n swutz i', na tz'iba'nt cyen le tu'j Kataj: "Nque'nwok tz'aknak cu'n chi jun yaj yi qui'c mu'x til, na ya'stzun wutane'n wetz. Chin tz'aknak cu'n in," stzun Ryos banak cyen.

Apocalípsis 6:10 na tal:

Chin chiwi' nin e'a'tz tan yol. Itzun na cyaltz: "Kajcaw chin xan nin ilu'. Nin na el k'abu' te yolu'. ¿Tona' tzun tz'ocu' tan chicawse'n yi e' yi ate' wuxtx'otx', yi e' yi ocnake' tan kabiyle'n?" —che'ch.

Tul Juan 17:11 tal Kajcaw Jesucristo yi chin xan nin Ryos:

"Yi in wetz, qui't na'tij mas tzone'j wi munt, na na'je'nt te'ju' Ta'. Chin xan nin ilu' Ta'. Che' q'uicy'leju' bin yi e' yi nche' tak'u' swetz. Che' q'uicy'leju' tan yi poreru', bantz cwe'n tok'bel tib yi cyajtza'kl, chi kutane'n ketz tuch'u' Ta'.

Yi Ryos i' taw yi lok' ib (Dios es amor)

1 Juan 4:16 na tal: Yi o' ketz, ja el katxum tetz, nin na kocsaj yi na pek' Ryos ske'j na i' taw nin i' xe' yi lok' ib. Ej nin yi e' yi na chitzan tan x̄chajle'n yi lok' ib, ya'stzun yi e' yi xomche' te Ryos. Ej nin ya'stzun yi e' yi xomij Ryos scye'j.

Ryos nchajon yi lok' ib sketz, yi ntaxk el katxum tetz. Cha'stzun te na kapek' te'j i' jalu'.

a). Kataj Ryos na pek' ske'j kacyakil

Na pek' i' te yi Cy'ajl yi i'tz Jesucristo, kasi'le' Mateo 3:17; 17:5.

Mateo 3:17

Nin ben quibital jun yoltz tcyaj yi na tal: "Yi june'j ya'stzun yi jun tal x̄tutuj inCy'ajl yi wi'nin ok'le'n wutz wak'un."

Mateo 17:5

I cunin na tzan Lu' tan yolche'n yi yole'j, yi cwe'n mule'n noc sbak' scye'j. Chin litz'unin yi sbak'a'tz, nin ben quibital jun yoltz: "Yi june'j, ya'stzun inCy'ajl, wi'nin ok'le'n wutz wa'n. Bitwok yi ca'wl i'," stzun yi juna'tz ban tzajtz.

Ncha'tz wi'nin na pek' i' scye'j yi e' yi na chitzan tan banle'n tane'n yi tetz ca'wl.

Kasi'le' Juan 14:21,23; 16:27; Romanos 5:8-10:

Juan 14:21,23

21 Cyakil yi e' yi na el chitxum tetz inca'wl, nin na chitzan tan banle'n tane'n, ya'stzun yi e' yi na chipek' swe'j. Ej nin ncha'tz in chimpek'ok scye'j. Nin pek'ok Intaj scye'j yi e' yi na chipek' swe'j. Nin slajluchaxk x̄chiwutz yi xomchin scye'j, —stzun Jesús scyetz yi e' x̄chusbe'tz.

23 —Cyakil yi e' yi na chipek' swe'j, na chitzan tan banle'n tane'n wetz inchusu'n yi na intxol. Ncha'tz Intaj, spek'ok scye'j. Nin skanajank scye'j.

Juan 16:27

Na wi'nin na pek' Intaj tzite'j. Na pek' i' tzite'j, na na cxpek'wok swe'j. Ej nin na pek' i' tzite'j na ja itocsaj yi cho'n sajnakin te i'.

Romanos 5:8-10

8 Poro yi Kataj Ryos el k'ajab ske'j. Wech o' len cu'n juchul il, nin qui'c mu'x̄ tal kaxac yi quime'n Cristo ta'n tetz kaxel.

9 Na tan tu' yi tele'n kojxuj yi x̄ch'el Cristo ja wi't jal kabalajil swutz Ryos. Ej nin ko ya'tz, ¿qui ptzun tz'oc Cristo tan kacolche'n tk'ab yi caws yi at tulbil tan Ryos squib cyakil wunak? Tz'ocopon.

10 Sajle'n o' cu'n contr tu Ryos. Poro tan tu' yi quime'n yi tetz Cy'ajl tetz kaxel, ja xit yi oyintzi' tuch'. I bin jalu', yi ko xitnak yi oyintzi' yi at skaxo'l tuch', qui'ct bin kabembil tk'ab yi kacaws yi tx'aklij skawutz, na at nin Cristo tan kacolche'n.

Na pek' Ryos scye'j cyakil wunak, tul Juan 3:16 na tal: Ya'stzun sbajok na wi'nin na pek' Ryos scye'j cyakil yi e' wunak yi ate' wi munt. Cha'stzun te saje'n xchakol yi jun tal xutuj Cy'ajl tzone'j. Nin alchok scyetz yil k'uke' c'u'l te yi jun tal xutuj Cy'ajl Ryosa'tz, nk'e'tz sotzel wutz sbne', ma na scambaje' yi itz'ajbil yi qui bajsbe'n tetz.

Tan yi xtxolbile'j na el katxum tetz yi Kataj Ryos na pek' i' scye'j cyakil yi e' wunak nin qui na taj i' yi nink chitij yi jun q'uixc'uja'tz tetz ben k'ej ben sak, poro tan tu' yi qui na cyaj yi e' wunak yil chixom te yi tetz ca'wl stk'e' chicaws, poro yi tajbil i' i'tz yi xë'nk chiclax. Cha'stzun te quime'n Cristo tetz chixel. Tan lajluchaxe'n yi xtxolbil swutzu' ba'n si'leju' le Biblia (Ezequiel 33:11; Romanos 5:8; 1 Timoteo 2:4; 2 Pedro 3:9).

b). ¿Xë'n na xchaj Kataj Ryos yi lok' ib sketz?

Ja xchaj i' yi lok' ib sketz yi tk'ol i' yi jun tal xutuj Cy'ajl tan quime'n tetz kaxel tan xchojle'n yi kil. Si'leju' Juan 13:16; 1 Juan 4:10; Hebreos 12:5-12.

Na xchaj Ryos yi lok' ib sketz na ja cuy i' kapaj yi o' yi xomcho' te yi ca'wl Jesucristo, si'leju' Romanos 2:25, 26.

Na xchaj Ryos yi lok' ib sketz jalu', na na cuy i' chipaj cyakil yi e' creyent yi na chijuch quil, si'leju' 1 Juan 1:9 nin Apocalípsis 3:20.

Yi Ryos chin tz'aknak cu'n tajtza'kl (Justo)

Yi na elpont yi xtxolbile'j i'tz yi ba'n atit yi tajtza'kl Ryos yi na tak' i' caws jun wunak, nka yi na cuy paj jun wunak. Tul Apocalípsis 16:5 na jilon te jun chin caws yi stk'e' Ryos scyetz wunak, poro ba'n atit yi tajtza'kl i', na je yol jun ángel ban tetz: “Ba'n mbanu' Ta', yi ilu' teru' yi chin xan nin ilu', yi ilu' teru' yi ixnin atu'-tz tetz cyakil tiemp. Ba'n mbanu' yi ncu' xtxumulu' chicaws yi e' wunak yi ate' wuxtx'otx'”.

At wi'nin wunak yi at chik'ej, at cyajtza'kl tane'n, poro na cyal yi qui'c Ryos at. Poro le Salmos 14:1 na tal: Xchiwutz yi e' yi qui'c chibe', qui'c Ryos at. Yi e'a'tz qui'c mu'x tal chixac. Yi e'chk takle'n yi na chiban, chin xa'bil nin. Cya'l jun yi najk pek' tan banle'n yi e'chk takle'n balaj.

Job 28:28 na tal: “...kol tzitak' itib tetz cu'n italma' tan ixcone'n swetz, na elpont yi at itajtza'kl”.

Tul cyakil yi Yol Kataj, na jilon te yi at jun Ryos yi bnol tetz yi tcya'j tu wuxtx'otx'. Alchok scyetz yi na taj tz'el xtxum tetz Kataj Ryos, tajwe'n yil tek i' x̄chi'. Nin chin tajwe'n cunin yil sban tane'n yi tetz tajbil.

Ncha'tz na tal Hebreos 11:6b “...qui'c rmeril tan tzatzine'n Ryos ske'j ko qui k'uklij kac'u'l te'j, na yi ko na kaḡkans quen kib te i' tajwe'n cu'n yil kocsaj cunin yi at i', ej nin yi list i' tan tak'le'n e'chk takle'n balaj sketz, cyakil o' yi na ko'c tan joyle'n i'.”

YI RYOS YI ITZ' NIN TETZ

1. ¿X̄e'n na el katxum tetz yi at Kataj Ryos?

A. Na el katxum tetz tan cyakil yi e'chk takle'n yi bnixnak ta'n.

Kataj Ryos bnol tetz cyakil yi e'chk takle'n le xe'tzbil tzaj, ba'n si'leju' Génesis 1:1; Isaías 48:12-13; Juan 1:3.

Kataj Ryos xicyol tetz cyakil yi e'chk takle'natz yi bnixnak ta'n, ba'n si'leju' Hebreos 1:3 nin Job 14:6.

Cyakil yi at tcya'j tu cyakil yi at wuxtx'otx' na x̄chaj yi k'ej tu porer Kataj Ryos, ba'n si'leju' Salmos 19:1 nin Romanos 1:20.

B. Na el katxum tetz yi at Kataj Ryos tan yi Biblia

Na ya'stzun yi e'chk xtxolbil yi tz'iba'nt, nin na lajluchax yi at Ryos tan yi e'chk xtxolbila'tz, ba'n si'leju' 2 Pedro 1:18-21.

C. Na el katxum tetz yi at Kataj Ryos tan yi cy'ajl i' yi Jesucristo

Cya'l jun tajske'n wutz Ryos, poro ja el katxum tetz tan tu' Jesucristo, na ite'nin Ryosa'tz. Na yi jun tal x̄utuj Cy'ajl Ryos yi cho'n najlij x̄laj i', itzun i'a'tz nchajon Ryos sketz, ba'n si'leju' Juan 1:8.

Je junt xtxolbile'j, ya'stzun yi jilone'n Kajcaw Jesús tetz Li'p, nin je yol i'e'j: “Lastum aḡ Li'p, ja el tiemp wa'n tzixo'l wok ḡmbi tzuntz yi qui na el atxum tetz yi na' scyetz in? Na alchok scyetz yi na el xtxum swetz, ja tzun el xtxum tetz Intaj. ¿Nxac tzun na c̄xtzan tan jakle'n tkanil intaj? Juan 14:9.”

Cha'stzun te, na el katxum tetz yi at Kataj Ryos tan yi Yol I'. Te yi tiempe'j ja xcon yi tetz Cy'ajl tan tlol yi tetz tajbil, kasi'le' yi xtxolbil yi xomt tzaj.

“Poro te yi tiemp yi ato' tul jalu', ja xcon yi tetz Cy'ajl ta'n tan tlol yi tetz tajbil sketz. Yi Cy'ajola'tz bixba'nt ta'n tan tetzal cyakil e'chk takle'n, na i' txumul tetz cyakil yi e'chk takle'n yi ja wi't bajij tu yi txe'n bajij.” Hebreos 1:2

D. Na el katxum tetz yi at Ryos tan yi Espíritu Sant

Kasi'le' cobox xtxolbil yi na jal tul yi Yol Kataj:

1 Juan 4:13 na tal:

Na el katxum tetz yi o' tetz Ryos nin xomij i' ske'j tan tu' yi na kanachon te'j yi najlij yi Espíritu Sant ske'j.

Romanos 8:16 na tal:

Ej nin na el katxum tetz yi o' me'l cy'ajl Ryos, na ite'n yi Espíritu Ryos na a'lon tetz kalma' yi o' mero me'l cy'ajl i'.

E. Na el katxum tetz yi at Kataj Ryos tan yi kajtza'kl

Na ite'nin kajtza'kl na a'lon yi at Ryos, ba'n kasi'lej Romanos 2:14,15.

14 Elnak intxum tetz yi qui'c jun e'chk takle'n xan. Nin bintzi nin yi xtxolbila'tz, na chusij chint tan Kajcaw. Poro ko at jun kajwutz yi le wutz tetz tajtza'kl sjalok til yi nink sban jun takle'n, sjalok tzun tiltz te'j kol sban.

15 Ncha'tz e' cyeru', ko na cyak'u' bis scyetz mas kajwutz tan yi e'chk takle'n yi na baj cya'nu', qui na yub. Na na elepont yi qui na chipek'u' scye'j, na na chitzanu' tan tak'le'n bis scyetz. E'u' kajwutz, quil chipit ninu' jun kajwutz tul il tan tu' e'chk takle'n yi na baj cya'nu'.

2. ¿Mbi na elpont yi na kal yi Kataj Ryos che'w cyek'ek' tu I'? (Espíritu)

A. Yi na elpont yi yol che'w cyek'ek' i'tz “espíritu” le castiy.

Na kal yi che'w cyek'ek' tu' Kataj Ryos na qui'c wankil chi kutane'n ketz, poro jun cu'n at i' sk'ej alchok ama'lil kale ato't.

Tul Juan 4:24 na tal sketz: Na yi Kataj Ryos, nk'e'tz lamij tane'n, ma na che'w cyek'ek' tu' i'. Cha'stzun te tajwe'n cu'n tan c'u'laje'n i' tetz cu'n kalma'. Na ya'stzun yi mero xtxolbil yi bintzinin na tzatzin i' te'j, —stzun Jesús.

B. Yi Kataj Ryos che'w cyek'ek' tu' i', na qui'c rmeril tan kilol wutz i'

Juan 1:18 na tal: Cya'l jun tajske'n wutz Ryos, poro ja el katxum tetz tan tu' Jesucristo, na ite'nin Ryosa'tz. Na yi jun tal x̄utuj Cy'ajl Ryos yi cho'n najlij x'aj i', itzun i'a'tz nchajon Ryos sketz.

Tul yi Yol Kataj na kil yi ala' cu'n tir x̄chaj tib Ryos x̄chiwutz yi e' wunak sajle'n tunintz. Poro xcon cobox puntil ta'n tan x̄chajol tib nin je yi puntil ban i' tan x̄chajol tib:

1. Ja x̄chaj tib Ryos chi jun yaj (Génesis 18:1-2; Éxodo 24:10)
2. Ja x̄chaj tib Ryos chi jun ángel (Génesis 22:11-17)
3. Ja x̄chaj tib Ryos chi jun boc'oj sbak' tu k'ak' (Éxodo 13:20; Números 14:14).
4. Ja x̄chaj tib Ryos chi jun plomx̄ (Mateo 3:16, 17)

Yi Kataj Ryos che'w cyek'ek' tu' I'. Cha'stzun te, tajwe'n cu'n tan kac'u'lal I' tetz cu'n kalma' (Juan 4:24).

Cha'stzun te, ko o' me'l cy'ajl Ryos katxumi'ch len bintz yi ya'tz Ryos yi e'chk teblal yi banij tu' tane'n. Ej nin qui'c rmeril yi nink ko'c tan chic'u'laje'n yi e'chk teblala'tz. (Hechos 17:29; Deuteronomio 4:15-18).

Tak' Kataj wi'nin banl tibu' tan yi jun chusu'ne'j.

TAN QUI TELE’N YI KACHUSU’N TE KAC’U’L



¿Mbi skabne’ tzone’j? Na taj si’le’n yi mbi na jak tzaj, tan nojse’n yi mbi na jaklij.

No.	Pregunta/enunciado	Respuesta
1	Yi Yol Kataj na x̄chaj sketz yi at ox bi’ Ryos	a. b. c.
2	Stz’ib cunu’ yi cita bíblica kale na jale’t yi txolbile’j: “Na tan tu’ paj jun yaj, na kaquim len. Poro ncha’tz tan tu’ junt yaj at rmeril yil kitz’ij x̄chixo’l alma’.”	
3	Quib na tal tul Efesios 4:30, ¿na’ najle’t yi Espíritu Sant?	
4	Quib na tal tul Génesis 1:2 ¿mbi’tz na xon tibaj yi a’ te ntaxk bnix jun takle’n?	
5	Stz’ib cunu’ yi cita bíblica kale na jale’t yi txolbile’j: “Ta’, at ninu’-tz te yi ntaxk bnix yi e’chk wutz yi at bene’n tzi’n. Nin at ninu’-tz te yi ntaxk bnix yi wuxtx’otx’, nin at ninu’-tz sajle’n tunintz nin sbne’ opon tunintz.”	
6	Quib yi na tal tul Romanos 1:20 ¿X̄e’n na lajluchax yi porer Ryos?	
7	¿Mbi na tal Mateo 28:20?	
8	¿Mbi citajil na jale’t? “Na chin tz’aknak cunin i’ te yol...” A. Santiago 1:17 B. Hebreos 6:18 C. 1 Juan 1:9	
9	¿Na’ na jale’t yi txolbil? “Yi june’j ya’stzun yi jun tal x̄tutuj inCy’ajl yi wi’nin ok’le’n wutz wak’un.”	
10	¿Na’ na jale’t yi txolbil? “Poro yi Kataj Ryos el k’ajab ske’j. Wech o’ len cu’n juchul il, nin qui’c mu’x̄ tal kaxac yi quime’n Cristo ta’n tetz kaxel.”	

¿Mbi skabne' tzone'j? Na taj stz'akse'n yi e'chk yol yi qui'c at, tan jale'n xtxolbil yi versículo.

1) Juan 1:1-2

“Le _____ tzaj at jun yi at nintz, yin a bi'aj Yol (Cy'ajol). At nin I'-tz tu Ryos, le _____ tzaj, na _____ Ryosa'tz.”

2) 1 Timoteo 2:5

Na _____ jun Ryos at, nin _____ jun _____ at _____ tu Ryos, i'tz _____ yi jun yi ncha'tz _____ i'.

3) Efesios 4:30

Quil _____ bis tetz yi _____ yi najlij te _____. Na i' jun _____ yi o' tetz _____. Nin tan tu' yi at i' te _____ jun cu'n _____ liwr yil tz'ul yi _____.

4) Mateo 28:18, 19

Toque'n tzun x̃kansal tib Jesús scye'j, nintzun taltz: —Ak'ij wetz _____ tan _____ tcya'j, nin tan _____.

Cha'stzun te _____ chixo'l cyakil yi _____ wunak _____ tzi'n wi munt.

Chuswoke' te weri _____; nin _____ tan bi' _____, nin tan _____ yi in _____, tu yi bi' yi _____.

5) Juan 1:48

—¿X̃e'n _____ xtxumu' _____? na qui _____ tib _____, —stzun Natanael tetz Jesús. —Te yi _____ jak' yi _____ wi' _____, ej nin yi _____ Li'p tan _____, nskan _____, —stzun Jesús bantz tetz.

¿Mbi lkaban tzone’j? Na taj si’le’n yi e’chk título tul cyakil yi chusu’n le kayol nin le paréntesis xljaj yi título at yi xtxolbil le castiy; ntin na taj copiare’n xljaj yi kayol.

No.	Le kayol	Le castiy
1	Yi Ryos at nin i’-tz le xe’tzibil tzaj	
2	Yi poder Ryos qui’c xe’tzibil	
3	At nin tunin Ryos lakak e’chk ama’l bene’n tzi’n	
4	Yi Ryos qui na xtx’ixpuj yi tajtza’kl	
5	Yi Ryos i’ taw cyakil yi ajtza’kl	
6	Yi Ryos chin xanin i’	
7	Yi Ryos i’ taw yi lok’ ib	
8	Yi Ryos chin tz’aknak cu’n yi tajtza’kl	